

## OFFERYNNAU STATUDOL CYMRU

### 2015 No. 1486

#### Rheoliadau Adeiladu (Diwygio) (Cymru) 2015

##### Enwi, cychwyn a chymhwyso

- 1.—(1) Enw'r Rheoliadau hyn yw Rheoliadau Adeiladu (Diwygio) (Cymru) 2015.
- (2) Mae'r Rheoliadau'n gymwys o ran Cymru ond nid ydynt yn gymwys o ran adeiladau ynni a eithrir yng Nghymru.
- (3) Mae'r Rheoliadau hyn yn dod i rym ar y dyddiadau canlynol—
- (a) y rheoliad hwn, rheoliadau 2, 3, 4(a) a'r Atodlen ar 31 Gorffennaf 2015; a
- (b) rheoliad 4(b) ar 31 Rhagfyr 2015.
- (4) Yn y rheoliad hwn, mae i “adeilad ynni a eithrir” yr ystyr a roddir i “excepted energy building” gan yr Atodlen i Orchymyn Gweinidogion Cymru (Trosglwyddo Swyddogaethau) (Rhif 2) 2009<sup>(1)</sup>.

##### Diwygio Rheoliadau Adeiladu 2010

2. Mae Rheoliadau Adeiladu 2010<sup>(2)</sup> wedi eu diwygio fel a ganlyn.
3. Yn lle'r Tabl yn Atodlen 3 (cynlluniau hunanardystio ac esemptiadau o'r gofyniad i roi hysbysiad adeiladu neu i adneuo cynlluniau llawn) rhodder y Tabl fel y'i nodir yn yr Atodlen i'r Rheoliadau hyn.
4. Yn rheoliad 43(4) (profi pwysedd)—
- (a) ar ôl “the British Institute of Non-Destructive Testing” mewnosoder “, the Independent Airtightness Testing Scheme Limited<sup>(3)</sup>”; a
- (b) hepgorer “the British Institute of Non-Destructive Testing,”.

7 Gorffennaf 2015

*Carl Sargeant*  
Y Gweinidog Cyfoeth Naturiol, un o  
Weinidogion Cymru

(1) [O.S. 2009/3019](#). Trosglwyddodd Gorchymyn Gweinidogion Cymru (Trosglwyddo Swyddogaethau) (Rhif 2) 2009 swyddogaethau penodol a roddwyd i'r Ysgrifennydd Gwladol gan neu o dan Ddeddf Adeiladu 1984, i'r graddau y maent yn arferadwy o ran Cymru, i Weinidogion Cymru. Darparodd erthygl 3(a) o'r Gorchymyn na throsglwyddwyd swyddogaethau i'r graddau yr oeddynt yn arferadwy mewn perthynas ag adeilad ynni a eithrir fel y diffinnir “excepted energy building” gan yr Atodlen i'r Gorchymyn.

(2) [O.S. 2010/2214](#); yr offerynnau diwygio perthnasol yw [O.S. 2011/1515](#), [O.S. 2012/718](#), [2012/3119](#), [O.S. 2013/747](#) (Cy. 89), [O.S. 2013/1105](#), [O.S. 2013/2621](#) (Cy. 258), [O.S. 2014/2362](#) ac [O.S. 2015/767](#). Nid yw diwygiadau eraill yn berthnasol i'r Rheoliadau hyn.

(3) Cwmni a ffurfiwyd ac a gofrestrwyd o dan y Deddfau Cwmnïau â'r rhif cofrestru 09309058.